

VENDIM
Nr.968, datë 2.7.2008

**PËR ORGANIZIMIN, KOMPETENCAT DHE FUNKSIONIMIN E AGJENCISË SË
ADMINISTRIMIT TË PASURIVE TË SEKUESTRUARA DHE TË KONFISKUARA**

Në mbështetje të nenit 100 të Kushtetutës, të pikës 2 të nenit 36 të ligjit nr.9284, datë 30.9.2004 “Për parandalimin dhe goditjen e krimit të organizuar” dhe të neneve 21 e 27 të ligjit nr.8379, datë 29.7.1998 “Për hartimin dhe zbatimin e Buxhetit të Shtetit të Republikës së Shqipërisë”, të ndryshuar, dhe të nenit 11 të ligjit nr.9836, datë 27.11.2007 “Për Buxhetin e Shtetit të vitit 2008”, të ndryshuar, me propozimin e Ministrit të Financave, Këshilli i Ministrave

VENDOSI:

KREU I
**AGJENCIA E ADMINISTRIMIT TË PASURIVE TË SEKUESTRUARA DHE TË
KONFISKUARA**

1. Agjencia e Administrimit të Pasurive të Sekuestruara dhe të Konfiskuara, më poshtë Agjencia, është institucion buxhetor, në varësi të Ministrit të Financave.

2. Struktura dhe organika e Agjencisë përcaktohen me urdhër të Kryeministrit, me propozimin e Ministrit të Financave. Personeli i Agjencisë përbëhet nga profesionistë të fushave të ndryshme, në përputhje me natyrën e punës dhe objektin e veprimtarisë, si specialistë, dhe nga personeli ndihmës. Marrëdhëniet e punës rregullohen me ligjin nr.7961, datë 12.7.1995 “Kodi i Punës në Republikën e Shqipërisë”, të ndryshuar.

3. Agjencia drejtohet nga kryeadministratori, i cili emërohet nga Ministri i Financave dhe ka këto detyra e përgjegjësi:

a) Drejton dhe organizon veprimtarinë dhe përgjigjet para Ministrit të Financave për veprimet e ndërmarra gjatë ushtrimit të veprimtarisë.

b) Harton rregulloren e brendshme, të cilën ia paraqet për miratim Ministrit të Financave.

c) Përfaqëson Agjencinë në marrëdhënie me të tretët, në përputhje me rregulloren e brendshme.

4. Agjencia mund të kontraktojë edhe personel të jashtëm, si administratorë të pasurive të sekuestruara dhe të konfiskuara, a ekspertë të fushave të tjera, duke lidhur me ta kontratë pune, me kohë të pjesshme, apo kontratë shërbimi. Procedurat për lidhjen e këtyre kontratave caktohen nga Ministri i Financave, me propozimin e kryeadministratorit të Agjencisë.

5. Agjencia ka një buxhet të veçantë, si pjesë përbërëse e buxhetit të Ministrisë së Financave. Ky buxhet mbulon shpenzimet për mbajtjen dhe funksionimin e Agjencisë dhe shpenzimet për administrimin e pasurive të sekuestruara dhe të konfiskuara. Plan vjetor i punës dhe buxheti i Agjencisë miratohen nga Ministri i Financave.

KREU II
OBJEKTI I VEPRIMTARISË

Agjencia ka për objekt të veprimtarisë:

a) administrimin e pasurive të sekuestruara dhe të konfiskuara me vendim të gjykatës, në zbatim të ligjit nr.9284, datë 30.9.2004 “Për parandalimin dhe goditjen e krimit të organizuar”;

b) administrimin e pasurive të sekuestruara, në zbatim të ligjit nr.9258, datë 15.7.2004 “Për masat kundër financimit të terrorizmit”;

c) bashkëpunimin me institucionet pjesëmarrëse në procesin e administrimit të pasurive të sekuestruara dhe të konfiskuara, si me gjykatat, prokurorinë, bankat, njësitë e qeverisjes

vendore dhe zyrat e regjistrimit të pasurive të paluajtshme, ku ndodhen pasuritë e paluajtshme, të sekuestruara dhe të konfiskuara;

ç) përgatitjen e raportit të vlerësimit tekniko-financiar, të cilin ia paraqet për miratim Ministrit të Financave, në përputhje me pikat 2 e 3 të nenit 31 të ligjit nr.9284, datë 30.9.2004 “Për parandalimin dhe goditjen e krimit të organizuar”;

d) verifikimin dhe përgatitjen e dokumentacionit për kërkesat për financimin e projekteve nga fondi i posaçëm, për parandalimin e kriminalitetit dhe edukimin ligjor, si dhe ndjek zbatimin e tyre;

dh) përgatitjen e raportit vjetor të administrimit të pasurive të sekuestruara dhe të konfiskuara, të cilin ia paraqet për miratim Ministrit të Financave, brenda datës 20 janar të vitit pasardhës.

KREU III SHPENZIMET PËR ADMINISTRIMIN E PASURIVE TË SEKUESTRUARA DHE TË KONFISKUARA

1. Shpenzimet e Agjencisë, për administrimin e pasurive të sekuestruara dhe të konfiskuara, përfshijnë:

1.1 Shpenzimet e funksionimit të kësaj Agjencie.

1.2 Shpenzimet për administrimin e pasurive të sekuestruara dhe të konfiskuara, të cilat përbëhen nga:

a) shpenzimet e marrjes në dorëzim;

b) shpenzimet e ruajtjes;

c) shpenzimet e sigurimit të domosdoshëm;

ç) shpenzimet e mirëmbajtjes;

d) shpenzimet për mundësimin e veprimtarisë në ato pasuri, të cilat mund të gjenerojnë të ardhura;

dh) shpenzimet për pagesën e administratorit të pasurisë dhe të personelit ndihmës, nëse ka të tillë;

e) shpenzimet për pagesën e shërbimeve të ekspertizës dhe të këshillimit teknik, për pasuritë e sekuestruara dhe të konfiskuara.

2. Shpenzimet për administrimin e secilës prej pasurive të sekuestruara dhe të konfiskuara kryhen nga Agjencia, me kërkesë të administratorit të pasurisë.

3. Shpenzimet për administrimin e secilës prej pasurive të sekuestruara dhe të konfiskuara përballohen nga të ardhurat e siguruar nga administrimi i tyre. Për ato pasuri, prej të cilave nuk mund të sigurohen të ardhura apo kur këto të ardhura nuk mjaftojnë, shpenzimet apo diferencat parapaguhën nga fondet e buxhetit të Agjencisë.

4. Në fund të periudhës së administrimit, shpenzimet e përballuara për administrimin e pasurisë përfshihen në llogaritë e administrimit të saj. Nëse fondet e siguruar në llogaritë e administrimit të pasurisë nuk mjaftojnë, ato paguhën, pjesërisht ose plotësisht, nga buxheti i Agjencisë, pa të drejtë kompensimi.

5. Procedurat dhe limitet e kryerjes së shpenzimeve për administrimin e pasurive të sekuestruara dhe të konfiskuara përcaktohen me udhëzim të Ministrit të Financave.

KREU IV TË ARDHURAT NGA ADMINISTRIMI I PASURIVE TË SEKUESTRUARA DHE TË KONFISKUARA

1. Administrimi i pasurive të sekuestruara dhe të konfiskuara përfshin, por pa u kufizuar, ruajtjen dhe përdorimin e këtyre pasurive për nxjerrjen e të ardhurave.

2. Procedurat e mbledhjes dhe të administrimit të të ardhurave përcaktohen në rregulloren e miratuar nga Ministri i Financave.

3. Sipas nenit 39 të ligjit nr.9284, datë 30.9.2004, krijohet fondi i posaçëm për parandalimin e kriminalitetit dhe edukimin ligjor, i cili administrohet nga Ministri i Financave, mbështetur në mendimin e komitetit këshillimor për masat kundër krimit të organizuar.

KREU V ADMINISTRATORI I PASURISË

1. Pasuritë e sekuestruara dhe të konfiskuara, të cilat janë objekt i veprimtarisë së Agjencisë, merren në administrim përmes një akti të marrjes në dorëzim, të mbajtur nga përfaqësues të autoritetit, që ka vendosur sekuestron, përfaqësues të Agjencisë dhe të administratorit të pasurisë.

2. Akti i marrjes në dorëzim të pasurisë shoqërohet me librat e llogarisë, nëse ka, të cilat Agjencia ia kërkon pronarit të pasurisë ose administratorëve. Në rast të mosparaqitjes së këtij dokumentacioni dhe nëse e gjykon të nevojshme, Agjencia mbledh të dhëna, në rrugë zyrtare, dhe ia vë në dispozicion ekspertit kontabël, të caktuar prej saj, i cili paraqet raportin përkatës.

3. Administratori përgatit një plan shpenzimesh dhe të ardhurash për pasurinë/të në administrim të tij, të cilin e dorëzon për miratim te kryeadministratori i Agjencisë.

4. Administratori kryen raportimet e parashikuara me ligj, si dhe përgatit raporte të tjera, me kërkesë të kryeadministratorit të Agjencisë.

5. Detyrat e administratorit të pasurisë përcaktohen në rregulloren e brendshme të Agjencisë.

KREU VI MBAJTJA DHE EVIDENTIMI I TË DHËNAVE

1. Shpenzimet dhe të ardhurat nga administrimi i secilës prej pasurive të sekuestruara dhe të konfiskuara llogariten për kohën, gjatë së cilës janë marrë në administrim, dhe evidentohen në kartela të veçanta të pasurisë në administrim. Çdo veprim regjistrohet në bazë të dokumentacionit ligjor, përkatës.

2. Në fund të çdo viti financiar, Agjencia përgatit dhe paraqet te ministri i Financave raportin përmbledhës financiar të veprimtarisë.

3. Rregullat e hollësishme për mënyrën e mbajtjes dhe të evidentimit të shpenzimeve dhe të të ardhurave të pasurive të sekuestruara e të konfiskuara përcaktohen me udhëzim të ministrit të Financave.

KREU VII DISPOZITA TË PËRGJITHSHME

1. Ministrisë së Financave, në buxhetin e miratuar për vitin 2008, t'i shtohet fondi prej 10 000 000 (dhjetë milionë) lekësh, për përballimin e efekteve financiare, për ushtrimin e veprimtarisë së Agjencisë së Administrimit të Pasurive të Sekuestruara dhe të Konfiskuara.

2. Ky fond të përballohet nga fondi rezervë i Këshillit të Ministrave.

3. Vendimi nr.503, datë 30.6.2005, i Këshillit të Ministrave “Për organizimin, kompetencat dhe funksionimin e Agjencisë së Administrimit të Pasurive të Sekuestruara dhe të Konfiskuara”, i ndryshuar, shfuqizohet.

4. Ngarkohen Ministria e Financave dhe Agjencia e Administrimit të Pasurive të Sekuestruara dhe Konfiskuara për zbatimin e këtij vendimi.

Ky vendim hyn në fuqi menjëherë dhe botohet në Fletoren Zyrtare.

KRYEMINISTRI

Sali Berisha